

GORDAILU BERRIKO PRESTAKIZUN LANEZ (*)

Etxebarri, 1985-IX-26

Jose Luis Lizundia


Idazkari- Ordea

Bilboko Iralabarri aldean alokaturik genuen Gordailua liburuz gainzka zegoela ikusirik batetik, eta nolabait zaharkitua, batez ere hauts ugariarekin, bestetik, Zuzendaritza eta Ekonomi Batzordean planteatu zen aspaldi Gordailu berri baten premia. Bestalde, egoera oso larria zen, zeren eta zenbait inprimategik guri egindako liburuak depositoan zituzten, gure toki faltaz.

Azkenik, enpresa batek libre uzten zuen planta industrial baten albistea izan genuen, salgai zeukala eta. Bilboko irteeran eta Donostiara-ko errepidean, Etxebarrin hain zuzen. Ekonomi Batzordeak zenbait aurre-jestio egin zituen eta erostea proposatu. Honen kontu eman eta onartu zen iazko Urriaren 26an egindako batzarrean. Harez gero, jestioa jarraitu zuten zenbait gora-beherakin, batez ere, lehengo jabe eta saltzailearen hipoteka bat zela eta. Erosteke, bestalde, Lankide Aurrezki Kutxaren kreditu bat lortu zen nahikoa baldintza onekin. Burutzeko, notariren aurrean 85-V-15 sinatu zuten Pedro M.^a Jauregi saltzaileak eta Euskaltzainburuak erosketako eskritura. Jestiogintza hau, gehien bat, Juanjo Zearreta, Xabier Gereño eta Federico Gonzalez legegizonak eraman dute.

Berehala, Gordailua egokitzeko obrak hastea zen eta horretarako arkitekto eta aparailariarekin harremanetan jarri. Gordailua ikusiz bilera bat egin genuen, Etxebarrin bertan, Juanjo, Gereño, Ricardo, Rosa Marik eta nik, Patxi Enziondo arkitektoa eta Angel M.^a Beaskoa aparailariarekin. Proiektua prestatu zuten eta Arkitekto Kolegiotik jaso ondoren, Ekonomi Batzordeak aurrekontua onartu zuen. Jarraian, bi kontratistei eskatu zitzairen aurrekontua eta bigarrena, alegia, Fernando Cuesta jaunarena hobeagoa zela ikusi zen eta batez ere, teknikoei aurkeztutako kontratista zela Cuesta jauna. Uztailean finkatu zituzten zehaztasunak Juanjo, Ricardo eta Rosa Marik, teknikoei kontaturik. Zehaztasun gehiago nahi izanik, Juanjo Zearretak emango dizkizue.

(*) Argitalpen batzordeak, Etxebarrin, gordailu berriaren inaugurazioa dela egindako bileraren hasieran irakurritako berri ematea.



Ezkerretatik eskubitara: Jean Haritschelhar, Jose Antonio Arana Martija, Endrike Knörr, Alfonso Irigoien, Jose M.^a Satrustegi, Fr. Luis Villasante - *Euskaltzainburua* -, Ricardo Badiola Uriarte, Patxi Altuna, Juan San Martin eta Juanjo Zearreta. (*Argitalpenen Baizordea*, Etxebarri, 1985-XI-25).

Abuztuan, hasi eta burutu zituen kontratistak ia obra guztiak, Ricardo Badiolak eta biok lanen jarraipen zuzena eginez, lehen parte guztian. Irail honen hasieran apal jartzearen kriterioa bateratzen dute hemengo lankideek, J. A. Aranaren iritzia ere jasoz. Iberduero eta Telefónica argi indarra eta telefonoa jartzeko jessioak burutzen ditu Juanjok. Aurretiaz Etxebarriko Udalarekin hasitako jessioak, baimen, zerga, etab., jarraitzen dute bertako agintari eta teknikoen harrera onez, baina honen berri Juanjo eta Rikardok hobeki eman dezakete.

Garraio lanak, alegia, Gordailu zaharretik berrirako aldatetarenak, Irailaren 10ean hasten ditugu. Hori prestatzeko lan bilera bat egiten dugu bezperan eta nolabait deitzeko, emergentzia plan bat nahi eta nahiezkoa dela ikusten dugu, alegia, Arbietoko bulego osoak bere lan guztiak utzi eta horretan murgiltzea. Materialak garraiatzeko Andres Jauregi larrabetzuarra kontratatzen da, beste mutil birekin eta kamioekin bera arduratuz. 10ean, Gordailu zaharreko apaletan genituen liburu solteak paketatzen dituzte: Rosa Mari, Josune, Bego eta Zorionek (neska hau noizbehinka, Liburu Azoka eta paketatzen lan berezietarako hartzen dugu). Josunek batez ere, Jokin Zaitegiren fondoak paketatzen zuten. Lanik latz eta gogorrekin Irailaren 11, 12 eta 13an egiten ditugu kamioiekin. Gordailu zaharrean kargatzea: Xabier, Ricardo, Resu eta Rosa Marik egiten dute, Jauregiren bi mutilekin. Etxebarrin deskargatzea: Juanjo, Lutxi eta hirurok egiten dugu, bulegoaren arta izateko Bego utziz. Batez beste, goizeko 10etan hasi eta gaueko 8-10 bitarterarte. Lan astun honetan nesken portaera azpimarratu nahi nuke.

Harez gero, Rosa Mari eta Resuk ordena minimo batez, pilatzen dituzte liburuak sortaz-sorta, behin-behingo sailkaketa eginez. Orain, berehala, inbentario zehatza egiten hasi beharko da, ondoren, Durangoko Liburu Azokarako katalogo berria ateratzeko, azken urteotan ohitura hartzen hasiak garen bezala. Bestalde, Ekonomi Batzordeak bere azken bileran ikusi zuen, bilera berezi bat egitea Gordailuan bertan, liburuei irteera emateko plangintza prestatzeko hain zuzen.

Azkenik, Euskaltzaindiak zer argitalpen "stock" duen ikusi eta jabetzeko, Gordailu berri hau ikustera gonbidatzen zaituztegu.